

BOSNA I HERCEGOVINA
Federacija Bosne i Hercegovine
TUZLANSKI KANTON
VLADA

ZAKON O KULTURI
(NACRT)

septembar 2021. godine

Na osnovu člana 24. stav (1) tačka c) Ustava Tuzlanskog kantona („Službene novine Tuzlansko - podrinjskog kantona“, br. 7/97 i 3/99 i „Službene novine Tuzlanskog kantona“, br. 13/99, 10/00, 14/02, 6/04 i 10/04), na prijedlog Vlade Tuzlanskog kantona, Skupština Tuzlanskog kantona, na sjednici održanoj _____2021. godine, donosi

NACRT

ZAKON O KULTURI

POGLAVLJE I - OPĆE ODREDBE

Član 1. (Predmet zakona)

Ovim zakonom utvrđuje se javni interes u kulturi, pojam, načela i djelatnosti u oblasti kulture, nosioci djelatnosti u oblasti kulture, uslovi za djelovanje nosilaca djelatnosti u oblasti kulture, osnivanje ustanova za obavljanje djelatnosti kulture, status i prava fizičkih lica kao nosilaca djelatnosti u oblasti kulture, amatersko djelovanje u oblasti kulture, registar i evidencija pravnih i fizičkih lica u oblasti kulture, finansiranje i podrška razvoju kulture, nadzor i druga pitanja od značaja za oblast kulture.

Član 2. (Gramatička terminologija)

(1) Gramatička terminologija korištenja muškog i ženskog roda za pojmove u ovom zakonu, podrazumijeva oba roda.

(2) Izrazi koji se koriste u ovom zakonu, koji su navedeni u jednini ili množini, odnose se jednako i na jedninu i množinu, osim ako kontekst ne zahtijeva drugačije.

Član 3. (Pojam kulture)

(1) Kultura obuhvata kulturno i umjetničko stvaralaštvo i djelatnosti kojima se stvaraju, prezentuju, promovišu, štite i čuvaju kulturna dobra, umjetnička djela i druge umjetničke i duhovne tvorevine, stručni i naučno – istraživački rad u kulturi i usluge od neposrednog značaja za ostvarivanje kulturnog i umjetničkog stvaralaštva.

(2) Kultura je od javnog interesa za Tuzlanski kanton (u daljem tekstu: Kanton).

Član 4. (Ostvarivanje javnog interesa u kulturi)

(1) Ostvarivanje javnog interesa u oblasti kulture obezbjeđuju Kanton i jedinice lokalne samouprave (u daljem tekstu: grad/općina).

(2) Način i mjere ostvarivanja javnog interesa u oblasti kulture utvrđuju se planskim i strateškim dokumentima u oblasti kulture na nivou Kantona i grada/općine.

Član 5.
(Načela u oblasti kulture)

Ostvarivanje javnog interesa u oblasti kulture se zasniva na slijedećim načelima:

- a) sloboda izražavanja u kulturnom i umjetničkom stvaralaštvu i poštovanja prava na kulturu;
- b) opredijeljenost Kantona i grada/općine da podstiču i pomažu razvoj kulture, kulturnog i umjetničkog stvaralaštva i zaštitu i očuvanje kulturne baštine;
- c) ravnopravnost očuvanja svih kulturnih identiteta i poštovanja kulturne različitosti;
- d) usaglašenost kulturnog sistema sa međunarodnim standardima, a naročito standardima Evropske Unije;
- e) uspostavljanje efikasnog, racionalnog i kreativnog upravljanja u kulturi;
- f) transparentno djelovanje u kulturi;
- g) poštovanje i zaštita autorskog i srodnih prava;
- h) demokratizacija kulturne politike.

POGLAVLJE II - JAVNI INTERES U KULTURI

Član 6.
(Ostvarivanje javnog interesa u kulturi)

Javni interes u oblasti kulture se ostvaruje:

- a) stvaranjem uslova za obavljanje i razvoj kulturnih djelatnosti;
- b) institucionalnim organizovanjem i obavljanjem djelatnosti kulture;
- c) stvaranjem uslova za podsticanje savremenog umjetničkog stvaralaštva i kreativnih industrija;
- d) zaštitom i očuvanjem kulturne baštine u skladu sa zakonom;
- e) podsticanjem međunarodne kulturne saradnje;
- f) podsticanjem stručnog i naučno - istraživačkog rada u kulturi;
- g) osiguranjem sredstava za finansiranje djelatnosti kulture iz Budžeta Kantona i budžeta grada/općine;
- h) finansiranjem rada ustanova kulture čiji je osnivač/suosnivač Kanton ili grad/općina;
- i) sufinansiranjem programa i projekata nosilaca djelatnosti u oblasti kulture iz Budžeta Kantona i budžeta grada/općine;
- j) stvaranjem uslova za podsticanje samostalnog kulturnog i umjetničkog stvaralaštva;
- k) podsticanjem amaterskog kulturnog i umjetničkog stvaralaštva;
- l) podsticanjem kulturnog i kreativnog rada osoba sa invaliditetom i dostupnosti svih kulturnih sadržaja osobama sa invaliditetom;
- m) podsticanjem umjetničkog i kulturnog stvaralaštva društveno osjetljivih grupa;
- n) stvaranjem javne infrastrukture u oblasti kulture;
- o) podsticanjem i unaprijeđenjem edukacije u oblasti kulturnih djelatnosti;
- p) drugim poslovima od javnog interesa, u skladu sa strateškim dokumentom u oblasti kulture.